

Yucatec - Pixanbe' Ba'atelo' Quili'ich Dzíbo' - SW Intro Scriptures

Lucas 17:5 Ca j'a'ala'ab ti' Yuumtzil tumen u aj canbalo'obo': Ya'abcunt c ocsaj óolal.

Romanos 10:17 Bey túuno' le ocsaj óolalo' cu taal tu yo'olal le u'uyajo', le ba'ax cu yu'uba'alo' u ma'alob péectzil Cristo.

Lucas 11:1 Jun téene' j payalchi'inaj Jesús ti' jun p'éel cúuchil. Le ca j dzo'oc u payalchi'e', a'ala'ab ti' tumen jun túul ti' u aj canbalo'ob: Yuumtzil, ca'anso'on payalchi' je'el bix tu ca'ansaj Juan u aj canbalo'obe'.

1 Timoteo 2:1-4 Yáax táanile' quin kubentic ca a káate'ex ti' Yuum le ba'axo'ob kaabéeto', ca payalchi'inaque'ex, ca káat óolnaque'ex yéetel ca a dza'ex nib óolal ti' tu yo'olal tuláacal máaco'ob. 2 Unaj u yúuchul payalchi' tu yo'olal le máaxo'ob cu beetic u nojochilo'obo' yéetel tu yo'olal tuláacal le jalach wínico'obo'. u ti'al ca páatac c cuxtal ich qui' óolal yéetel jéedzel óolal, jun p'éel cuxtal kuba'an ti' Yuum Ku yéetel tziquilbe'en ti' je'el ba'alaque'. 3 Lela' ma'alob yéetel utz tu t'aan Ku c Tocsajil, 4 tumen leti'e' u káat ca to'ococ tuláacal máaco'ob yéetel ca kuchuc u chuca'an kaj óolto'ob le jaajo'.

Zacarías 3:1,2 Cu dzo'ocole' Yuumtzile' tu ye'esaj ti' teen jun p'éel náay, tin wilaj wa'alacbal Josué, u noojoch aj kiino'ob tu táan u ángel Yuumtzil. Tu x no'oj Josuee', ti' ca'ach yaan le ángel aj tacpoolo', táan u dzáicubáa u tac u pool. 2 U ángel Yuumtzil túune', tu ya'alaj ti' le ángel aj tacpoolo': ¡Ca u keyech Yuumtzil! ¡Yuumtzil máax yaabiltmajil Jerusalene' bín u keyech! Tumen le j xiiba' bey jun p'éel t'aba'an chúuc jóokesa'an ichil náajche'obe'.

Efesios 6:12 tumen ma' táan c ba'atel tu contra máaco'obi', ba'ale' tu contra u muuk kaakas pixano'ob ti' le ca'anilben cúuchilo'obo', u káat u ya'ale', máaxo'ob cu tusbelo'ob, jalacho'ob yéetel yaan páajtalil ti'ob tu yóokol le éekjoch'e'en yóokolcaaba'.

Efesios 6:10,11 Beoraa', sucu'une'ex, mu'ukancunsaba'ex ti' Yuumtzil tu yo'olal u mu'ukanil páajtalil. 11 Búuquinte'ex tuláacal le u nu'uculil ba'atel cu dzáic te'ex Kuo', u ti'al ca páatac a jéedzel p'áatale'ex tu contra u táabsajilo'ob kasilba'al.

Efesios 6:13-17 Le o'olale' ch'a'ex tuláacal le u nu'uculil ba'atel cu dzáic te'ex Kuo', u ti'al ca páatac a xachicaba'ex ti' le kaakas kiino', yéetel cu dzo'ocol a xachicaba'exe', ca páatac a jéedzel p'áatale'ex. 14 Jéedzel p'áatene'ex túun, a kaxnaktmaje'ex le jaajo' bey jun p'éel kaxnake', yéetel cananta'ane'ex tumen le tojo' je'el bix le u búuquil ba'atel cu canantic u tzeem le soldadoo'. 15 Nu'uictaba'ex u ti'al a tze'ectique'ex u ma'alob péectzilil le jéedzelo', je'el bix le soldado' cu nu'uicticubáa le quéen u dzáa xanab tu yooco'. 16 tu yóokol tuláacale' yanac te'ex le ocsaj óolal bey je'el bix jun p'éel pixibe', u ti'al ca páatac a tupique'ex tuláacal u t'aba'an julubo'ob kasilba'al. 17 Yanac te'ex le tocsajil bey je'el bix jun p'éel chichich p'óoque' yéetel ch'a'ex u quili'ich t'aan Ku bey je'el bix le máascab cu dzáic te'ex le Quili'ich pixano'.

Hebreos 4:12 Tumen u t'aan Kue' cuxa'an yéetel yaan u páajtalil. asab yaan u yej ti' je'el máacalmáac máascabil ca'a p'éel u yeje', yéetel cu yocol tac tu mas

taamil u yóol yéetel u pixan máac, tac ti' le ba'ax asab ta'acbe'en ti' máaco'; yéetel cu jóokesic ti' sáasil u tuuculo'ob yéetel ba'axo'ob u káat u beet le pucsi'ikalo'.

Lucas 4:8 Ba'ale' Jesús tu núucaj ti': Tzelabáa tin táan, kasilba'al, tumen le Quili'ich Dzíibo' cu ya'alic: Kult Yuumtzil a Ku yéetel meyajt chéen leti'.

Efesios 6:18 Beete'ex tuláacal lela' yéetel payalchi' táan a káat óolale'ex mantadz ti' Ku tu yo'olal le Quili'ich Pixano'. P'il ichnene'ex yéetel ma' u lúubul a wóole'ex, payalchi'inene'ex xan tu yo'olal tuláacal le máaxo'ob u ti'alo'ob Kuo'.

1 Samuel 17:45-47 Davide' tu núucaj: Teche' ca taal tin wóokol yéetel máascab, lóomte' yéetel jabalina, ba'ale' tene' quin taal ta wóokol tu kaaba' Yuumtzil ti' máax yaan tuláacal páajtalil, u Junab Ku u múuch' aj ba'atelo'ob Israel, le máax dzo'oc a p'u'ujscico'. 46 Bejela'e', Yuumtzil bíin u kubech tin kab, bejela'e' bíin in quíimsech u ti'al ca in kup a pool, bey xan u quimenilo'ob u múuch' aj ba'atelilo'ob le j filisteobo', bíin in dzáa ti' le ch'icho'ob cu xiknalo'ob yéetel ti' dzíidzic ba'alche'ob yaan j káaxo'. Beyo' tuláacal yóokolcaab bíin ojéltic yaan Ku Israel; 47 tuláacal le máaxo'ob much'ucbalo'ob waye', bíin u yojéelto'ob, Yuumtzile' ma' tu tocsaj yéetel máascab mix yéetel lóomte'i. Le ba'atela', u ba'atel Yuumtzil, leti' bíin u kubech tin kab.

Lucas 10:17-20 Le setenta yéetel ca'a túul aj canbalo'obo' suunajo'ob yéetel qui'imac óolal, táan u ya'alicob: Yuumtzil, tac le kaakas pixano'ob cu yu'ubico'ob c t'aan ta kaaba'. 18 Jesuse' tu ya'alaj ti'ob: Bey, tene' tin wilaj u lúubul satanas bey u léembal cháac cu yéemel ca'ane'. 19 Tene' dzo'oc in dzáic te'ex páajtalil u ti'al a pe'echa'aktique'ex cano'ob yéetel síina'ano'ob, yéetel u ti'al a t'onquinsique'ex máax p'ecmaile'ex. Mixba'al cu páajtal u beetic te'ex kaas. 20 Ba'ale' ma' u qui'imacchajal a wóole'ex tumen le kaakas pixano'ob cu yu'ubico'ob a t'aane'exo', ba'ale' qui'imacchajac a wóole'ex tumen dzíiba'an a kaaba'ex te j ca'ano'.

2 Corintios 10:3-5 Quex tumen lu'umcabilo'one' ma' táan c ba'atel je'el bix u máaquilo'ob le yóokolcaaba'. 4 Tumen u nu'uculilo'ob c ba'atele' ma' yóokolcaabilo'obi', ba'ale' u nuuquilo'ob c ba'ate'ele' yaan u páajtalil Ku ti'ob u ti'al u xu'ulsico'ob nucuch pakil najo'ob. 5 Bey túuno', c xu'ulsic le tac poolo'obo' bey xan je'el ba'alac ca líikic yéetel ca'anal ichil u ti'al u wet'ic u kaj óolta'al Kue'. tuláacal lu'umcabil tuucule' c dzáic yáanal u páajtalil u tuucul Cristo, u ti'al u yu'uba'al u t'aan leti',

2 Timoteo 1:7 Tumen Kue' ma' tu dzáa to'on u pixanil sajaquil, ba'ale' u pixanil páajtalil, yaacunaj yéetel ma'alob tuucul.

Mateo 12:28,29 Ba'ale' tene' táan in tojolch'intic le kaakas pixano'obo' yéetel u páajtalil u Quili'ich Pixan Ku, lelo' u káat u ya'ale' dzo'oc u kuchul ti' te'ex u ajawil Ku. 29Tumen: ¿Bix je'el u páajtal u yocol wa máax tu yotoch jun túul mu'uka'an máac u ti'al ca ocla'ac u ba'aluba'ob wa ma' tu ka'axal tánile'? Tumen chéen bey je'el u páajtal u yocla'al u yotoche'.

Efesios 1:13 Bey xan te'ex, le ca ta wu'uye'ex ma'alob u péectzilil le jaajilo', yéetel ca ta wocsaj óolte'ex Cristoe', j nu'upe'ex ti' leti' bey xan sellarta'abe'ex yéetel le quili'ich Pixan u ya'almaj u dzáico'.

Hechos 19:6 Le ca tu dzaj Pablo u kab tu yóokolo'obe', Quili'ich Pixane' j taal tu yóokolo'ob, ca j t'aanajo'ob ti' jejeláas t'aano'ob ca tu tzicbaltajo'ob péectzilo'ob tu kamajo'ob ti' Ku.

Marcos 16:15-18 Ca tu ya'alaj ti'ob: Xeene'ex ti' tuláacal yóokolcaab, yéetel tze'ecte'ex u ma'alob péectzil le tocsajila' ti' tuláacal máac. 16 Le máax cu yocsaj óoltic yéetel cu yocja'e, cu to'ocol. Ba'ale' le máax ma' tu yocsaj óoltique', cu xot kinta'al. 17 Le chículalo'ob cu bin ilbil ti' le máaxo'ob tu yocsaj óolo'obo', leti' lelo'oba': Tin kaaba' bín u jóokeso'ob kaakas pixano'ob; yaan u t'anico'ob túumben t'aano'ob; 18 wa cu machico'ob caano'ob yéetel wa cu yukico'ob loolob ukule', ma' táan u yúuchul mix jun p'éel loob ti'ob. Bey xan yaan u dzáic u kab'o'b yóokol le koja'ano'obo', lelo'oba' cu yutztalo'ob.

1 Juan 1:9 Ba'ale' wa c cáantic c kebano'obe', je'el u páajtal c alab óoltique', Kue' yaan u beetic ba'ax toj; bín u sa'ates c kebano'ob yéetel bín u p'o'on ti' tuláacal kaas.

Éxodo 20:5 Ma' a chíin pooltico'ob, mix a kultico'ob, tumen teen Yuumtzil a Junab Kue', Ku cu yaj óolal, cu jadzic u kasa'anil le taataob u p'ectmajeno'ob, líikbal ti' u paalalo'obe' tac ti' u ca'a áabilo'ob.

Salmos 109:17 Bey tumen tu yéeyaj le loolob t'aano', ¡loolob t'anta'ac! Ma' tu yóoltaj qui' t'aani', ¡ma' u qui' t'anta'all!

Jueces 16:16 Tu yo'olal u sen káatic Dalilae', Sansone' jach j náac u yóol ca tu dzíiboltaj ca'ach u quíimil;

Efesios 4:26 Wa ca kuuxile'exe' ma' a kebantale'ex; yéetel ma' u p'áatal bul kiin kuixe'ex.

Romanos 14:12 Bey túuno' cada jun túul ti' to'one' yaan u tzolic ti' Ku ba'ax u beetmaj.

1 Juan 2:23 Tuláacal máax cu cúulpachcuntic le Paalo' mina'an mix le Taata ti'o'; ba'ale' máax cu kamic le Paalo', ti' yaan le Taata ti' xano'.

Juan 14:6 Jesuse' tu núucaj ti': Teen le bejo', teen le jaajo' yéetel teen le cuxtalo'. Chéen tin wo'olale' cu páajtal u taal máac ti' le Taatao'.

Mateo 11:28-30 Co'otene'exe' ti' teen, tuláacale'exe' máaxe'exe' ca'anane'exe' ti' a meyaje'exe' yéetel máax aal a cuche'exe', teen bín in beet a je'ele'exe. 29 Bise'exe in cuch ta wóokole'exe, yéetel canbalnene'exe' ti' teen, tumen tene' chuca'an in wóol yéetel cabal u yóol in pucsi'ikal; beyo' bín a caxte'exe' je'elel u ti'al a pixane'exe. 30 Tumen in cuche' ma' aali' yéetel sáal u bisa'al.

2 Corintios 6:2 Tumen leti'e' cu ya'alic te j Quili'ich Dzíibo': Ti' ma'alob kiin tin wu'uyajech, ti' u kiinil tocsajil tin wáantech. Bejela'e' leti' le jach ma'alob kiino', bejela'e' leti' u kiinil tocsajil.

Romanos 10:13 Tumen bey u ya'alic: Tuláacal le máax ch'a'a chi'itic u kaaba' Yuumtzile' bín to'ococ.